

სსიპ - ივანე ჯავახიშვილის სახელობის თბილისის სახელმწიფო უნივერსიტეტის იურიდიული ფაკულტეტის დეკანის თანამდებობის დაკავებასთან დაკავშირებული საარჩევნო პროცედურების დამტკიცების თაობაზე

მუხლი 1. დეკანის არჩევნების ორგანიზაციული საკითხები

- 1.1 სსიპ - ივანე ჯავახიშვილის სახელობის თბილისის სახელმწიფო უნივერსიტეტის იურიდიული ფაკულტეტის (შემდგომში - ფაკულტეტი) დეკანის არჩევნებს ატარებს და არჩევნების დღეს აცხადებს ფაკულტეტის საბჭო (შემდგომში - ფაკულტეტის საბჭო);
- 1.2 არჩევნები ტარდება თავისუფალი და თანასწორი საარჩევნო პრინციპების საფუძველზე, ფარული კენჭისყრით;
- 1.3 არჩევნები ტარდება ფაკულტეტის საბჭოს სხდომაზე. თუ ფაკულტეტის დეკანი არის დეკანობის კანდიდატი, მას არ აქვს სხდომის თავმჯდომარეობის უფლება და ფაკულტეტის საბჭოს სხდომის თავმჯდომარეს სხდომის დაწყებამდე ირჩევს ფაკულტეტის საბჭო.

მუხლი 2. დეკანის თანამდებობის დაკავების მსურველთა განცხადებების მიღების წესი

- 2.1 დეკანის თანამდებობის დაკავების მსურველი პირი განცხადებით მიმართავს ფაკულტეტის საბჭოს. მასში მითითებული უნდა იყოს დაინტერესებული პირის ვინაობა, საცხოვრებელი მისამართი, საკონტაქტო ტელეფონის ნომერი, ელ.ფოსტის მისამართი, სასურველი თანამდებობის ზუსტი დასახელება.
- 2.2 დეკანის თანამდებობის დაკავების მსურველი პირის განცხადებასთან ერთად წარმოდგენილ უნდა იქნას:
 - ა) პირადობის მოწმობის ასლი;
 - ბ) ავტობიოგრაფია (CV);
 - გ) ორი ფოტოსურათი (3X4);
 - დ) ფაკულტეტის განვითარების კონცეფცია (არაუმეტეს 5 გვერდი);
 - ე) ცნობა სამედიცინო ნარკოლოგიური შემოწმების შესახებ;
 - ვ) ცნობა დაკავებული აკადემიური თანამდებობის შესახებ;
 - ზ) ორი რეკომენდაცია.
- 2.3 დეკანის თანამდებობის დასაკავებლად კანდიდატი რეგისტრირებულად ჩაითვლება, თუ იგი დადგენილ ვადაში ფაკულტეტის კანცელარიაში სრულყოფილად წარმოადგენს ამ მუხლით გათვალისწინებულ დოკუმენტაციას.

მუხლი 3. საარჩევნო ბიულეტენი

- 3.1 ფაკულტეტის საბჭოს წევრის მიერ ხმის მიცემა ხორციელდება საარჩევნო ბიულეტენზე სასურველი კანდიდატის რიგითი ნომრის შემოხაზვით და საარჩევნო ყუთში მოთავსებით. მათ დაბეჭდვაზე პასუხისმგებელია ფაკულტეტის ადმინისტრაცია;

3.2 საარჩევნო ბიულეტენზე აღინიშნება:

- ა) დაწესებულებისა და ფაკულტეტის სახელწოდება;
- ბ) ინფორმაცია იმის შესახებ, რომ ბიულეტენი განკუთვნილია ფაკულტეტის დეკანის არჩევნებისთვის;
- გ) ასარჩევი კანდიდატების ჩამონათვალი და რიგითი ნომერი ანბანის მიხედვით.

მუხლი 4. საარჩევნო ყუთი

- 4.1 ფაკულტეტის ადმინისტრაცია დეკანის არჩევნების ჩასატარებლად უზრუნველყოფს საარჩევნო კომისიის საარჩევნო ყუთით აღჭურვას, რომელიც კენჭისყრის დაწყებამდე მოწმდება, რათა საარჩევნო კომისიის წევრები და ფაკულტეტის საბჭოს წევრები დარწმუნდნენ, რომ იგი ცარიელია. კენჭისყრის დაწყებამდე საარჩევნო ყუთი ილუქება კომისიის წევრთა მიერ, ფაკულტეტის საბჭოს წევრების თანდასწრებით;
- 4.2 საარჩევნო ყუთი განთავსებული უნდა იყოს კენჭისყრის სხდომის ოთახში თვალსაჩინო ადგილას.

მუხლი 5. კენჭისყრის ორგანიზება

- 5.1 კენჭისყრა დეკანის ასარჩევად ტარდება 16:00 საათიდან 19:00 საათამდე, ფაკულტეტის მიერ გამოცხადებულ არჩევნების დღეს; (10.12.2021, №110/2021)
- 5.2 დეკანის არჩევის პროცედურების უზრუნველყოფის მიზნით, კენჭისყრის დაწყებამდე ფაკულტეტის საბჭო სრული შემადგენლობის უმრავლესობით, ღია კენჭისყრით, საბჭოს წევრთაგან ირჩევს საარჩევნო კომისიას 3 წევრის შემადგენლობით. მათ შორის ერთი წევრი არის სტუდენტი. საარჩევნო კომისიის წევრების არჩევის შემდეგ ფაკულტეტის საბჭოს წევრს უფლება აქვს ხმა მისცეს დეკანობის სასურველ კანდიდატს;
- 5.3 საარჩევნო სიაში შედის ფაკულტეტის საბჭოს ყველა წევრი. საარჩევნო სიაში მოცემულია ფაკულტეტის საბჭოს წევრის სახელი და გვარი;
- 5.4 კენჭისყრის დაწყებამდე საარჩევნო კომისიის წევრები ფაკულტეტის საბჭოს თანდასწრებით ითვლიან ცარიელ ბიულეტენებს. ბიულეტენების რაოდენობა უნდა უტოლდებოდეს ფაკულტეტის საბჭოს წევრების რაოდენობას, რომელსაც ემატება ათი სარეზერვო ბიულეტენი. სარეზერვო ბიულეტენები გამოიყენება გამოუყენებელი ბიულეტენის დაზიანების შემთხვევაში. ამ წესის მიზნებისათვის გამოუყენებელ ბიულეტენად მიიჩნევა ბიულეტენი საარჩევნო ყუთში ჩაგდებამდე.

მუხლი 6. არჩევნების პროცედურა

- 6.1 დეკანის არჩევა ხორციელდება ფაკულტეტის საბჭოს სხდომაზე, ფარული კენჭისყრის საფუძველზე;
- 6.2 კენჭისყრის სხდომაზე ფაკულტეტის საბჭოს წევრი საარჩევნო კომისიის წევრისაგან იღებს ერთ საარჩევნო ბიულეტენს, რასაც ადასტურებს ამომრჩეველთა სიაში მისი გვარის გასწვრივ ხელმოწერით (ბიულეტენზე უნდა იყოს საარჩევნო კომისიის ყველა წევრის ხელმოწერა). შემდეგ ფაკულტეტის წევრი შედის სპეციალურად მოწყობილ საარჩევნო კუთხეში, აკეთებს არჩევანს და აგდებს ბიულეტენს საარჩევნო ყუთში. საარჩევნო კუთხედ ითვლება ნებისმიერი განცალკევებული ადგილი, სადაც ხმის მიცემის ფარულობა დაცული იქნება;
- 6.3 ფაკულტეტის საბჭოს წევრს უფლება აქვს ხმა მისცეს მხოლოდ ერთ კანდიდატს;
- 6.4 კენჭისყრის სხდომის დაწყებიდან საბოლოო შედეგების გამოვლენამდე საარჩევნო კომისიის საქმიანობა ხორციელდება ფაკულტეტის საბჭოს სხდომაზე, საბჭოს წევრთა თანდასწრებით;

6.5 კენჭისყრა ჩატარებულად ითვლება, თუ მასში მონაწილეობას მიიღებს ფაკულტეტის საბჭოს წევრთა სრული შემადგენლობის ნახევარზე მეტი.

მუხლი 7. ხმების დათვლა

- 7.1 კენჭისყრის დასრულების შემდეგ საარჩევნო კომისია, ფაკულტეტის საბჭოს წევრთა თანდასწრებით ხსნის საარჩევნო ყუთს და ითვლის ბიულეტენების საერთო რაოდენობას. ბიულეტენების საერთო რაოდენობა უნდა ემთხვეოდეს ამომრჩეველთა სიაში ფაკულტეტის საბჭოს წევრთა ხელმოწერების რაოდენობას;
- 7.2 ბიულეტენების საერთო რაოდენობის დათვლის შემდეგ, საარჩევნო კომისიის წევრები ითვლიან დეკანობის თითოეული კანდიდატისათვის მიცემული ხმების რაოდენობას;
- 7.3 ბათილად მიიჩნევა ბიულეტენი, თუ ვერ დადგინდება, რომელი კანდიდატისთვის არის ხმა მიცემული;
- 7.4 ხმების დათვლის შემდეგ, საარჩევნო კომისიის წევრების მიერ ივსება შემაჯამებელი ოქმი, რომელშიც შედის შემდეგი მონაცემები:
- ა) ამომრჩეველთა რაოდენობა საარჩევნო სიის მიხედვით;
 - ბ) კენჭისყრაში მონაწილე ამომრჩეველთა რაოდენობა საარჩევნო სიაში ამომრჩეველთა ხელმოწერების მიხედვით;
 - გ) საარჩევნო ყუთში აღმოჩენილი საარჩევნო ბიულეტენების საერთო რაოდენობა;
 - დ) ბათილი საარჩევნო ბიულეტენების რაოდენობა;
 - ე) თითოეული კანდიდატის მიერ მოპოვებული ხმების რაოდენობა;
 - ვ) კომისიის ყველა წევრის ხელმოწერა.

მუხლი 7¹. არჩევნების ალტერნატიული პროცედურა (10.12.2021, №110/2021)

- 7¹.1 ქვეყანაში ისეთი მდგომარეობის არსებობისას, რომელიც ზღუდავს ან საფრთხეს უქმნის ფიზიკურ პირთა გადაადგილებას ან შეკრებას და შესაბამისად, წინამდებარე საარჩევნო პროცედურით გათვალისწინებული დებულებების შესრულების უზრუნველყოფას, შესაძლებელია, ფაკულტეტის საბჭოს გადაწყვეტილებით, დეკანის საარჩევნო პროცედურა განხორციელდეს დისტანციურად, კომპიუტერული პროგრამის გამოყენებით.
- 7¹.2 ამ მუხლის 7¹.1 პუნქტით გათვალისწინებული აუცილებლობისას ფაკულტეტის საბჭოს გადაწყვეტილებით:
- ა) ფაკულტეტის საბჭოს სხდომა დეკანის არჩევის მიზნით ტარდება დისტანციურად, კანონმდებლობის მოთხოვნების დაცვით;
 - ბ) მე-2 მუხლით გათვალისწინებული განცხადებისა და მისი დანართების წარმოდგენა შესაძლებელია ელექტრონულად, ფაკულტეტის საბჭოს მიერ განსაზღვრულ ელექტრონულ საფოსტო მისამართზე და ფორმატით;
 - გ) კენჭისყრის ჩატარება შესაძლებელია ამ პროცედურის მე-3 და მე-4 მუხლების, მე-5 მუხლის 5.1, 5.2 და 5.4 პუნქტების, მე-6 მუხლის 6.2 პუნქტისა და მე-7 მუხლის 7.1, 7.2 და 7.3 პუნქტების გათვალისწინების გარეშე, ხმის მიცემის თსუ-ის მიერ შემუშავებული ან სხვა ინტერნეტპლატფორმის საშუალებით, რომელსაც შეარჩევს და განსაზღვრავს ფაკულტეტის საბჭო და რომელიც უზრუნველყოფს ხმის მიმცემის სრულფასოვან იდენტიფიკაციას (მათ შორის პირადობის მოწმობის წარდგენით) და ხმის მიცემის სრულ ფარულობას;
- 7¹.3 მე-7 მუხლის 7.4 პუნქტით გათვალისწინებული შემაჯამებელი ოქმი საარჩევნო კომისიის მიერ ივსება შემდეგი მოთხოვნების გათვალისწინებით:
- ა) ამომრჩეველთა რაოდენობა საარჩევნო სიის მიხედვით;
 - ბ) კენჭისყრაში მონაწილე ამომრჩეველთა რაოდენობა;

- გ) შესაბამისი კომპიუტერული პროგრამით მიღებული ხმების რაოდენობა;
- დ) შესაბამისი კომპიუტერული პროგრამით მიღებული ისეთი ხმების რაოდენობა, სადაც გაურკვეველია ხმის მიმცემის არჩევანი ან დადებითი ხმა მიცემულია ერთზე მეტ კანდიდატზე - ბათილი ხმა;
- ე) თითოეული კანდიდატის მიერ მოპოვებული ხმების რაოდენობა;
- ვ) კომისიის ყველა წევრის ხელმოწერა.

მუხლი 8. არჩევნების შედეგების შეჯამება

- 8.1 დეკანის თანამდებობაზე აირჩევა კანდიდატი, რომელსაც ხმას მისცემს ფაკულტეტის საბჭოს წევრთა სიითი შემადგენლობის უმრავლესობა;
- 8.2 იმ შემთხვევაში, თუ დეკანის არჩევნებში მონაწილე კანდიდატთაგან ვერცერთი ვერ მიიღებს ფაკულტეტის საბჭოს წევრთა სიითი შემადგენლობის უმრავლესობის მხარდაჭერას, ტარდება არჩევნების მეორე ტური, სადაც მონაწილეობს ორი უკეთესი შედეგის მქონე კანდიდატი. გამარჯვებულად ჩაითვლება კანდიდატი, რომელიც მიიღებს ფაკულტეტის საბჭოს დამსწრე წევრთა ხმების უმრავლესობას;
- 8.3 იმ შემთხვევაში, თუ დეკანის არჩევნებში მონაწილეობს ერთი კანდიდატი და ვერ მიიღებს ფაკულტეტის საბჭოს წევრთა სიითი შემადგენლობის უმრავლესობის მხარდაჭერას, ტარდება არჩევნების მეორე ტური. არჩევნებში მონაწილე კანდიდატი გამარჯვებულად ჩაითვლება, თუ მიიღებს ფაკულტეტის საბჭოს დამსწრე წევრთა ხმების უმრავლესობას;
- 8.4 თუ მეორე ტურში მონაწილე კანდიდატებმა მიღეს ხმათა თანაბარი რაოდენობა, ან მეორე ტურში მონაწილე ერთადერთმა კანდიდატმა ვერ მიიღო ხმათა საჭირო რაოდენობა, ტარდება ხელახალი კენჭისყრა. თუ ამ შემთხვევაშიც ვერ გამოვლინდა გამარჯვებული, უნივერსიტეტის წესდებით გათვალისწინებული პროცედურის მიხედვით, ტარდება ახალი არჩევნები;
- 8.5 თუ ამ მუხლით დადგენილ კენჭისყრაში მონაწილეობას არ მიიღებს ფაკულტეტის საბჭოს წევრთა სრული შემადგენლობის ნახევარზე მეტი, დეკანის არჩევნების ხელახალ დღეს ნიშნავს ფაკულტეტის საბჭო.

მუხლი 9. დეკანის თანამდებობაზე არჩეული კანდიდატის დამტკიცება

ფაკულტეტის საბჭო, კენჭისყრის შედეგების გამოვლენის შემდეგ, იმავე სხდომაზე ფაკულტეტის საბჭოს წევრთა სიითი შემადგენლობის უმრავლესობით იღებს გადაწყვეტილებას დეკანის არჩევის შესახებ.